


東都外郭城圖



西北。金谷亭、大帝造。凌波宮。隋造。六典：穀、維二水會于苑中，中有十一宮。

隋及唐初苑內，又有朝陽宮、栖雲宮、景華宮、成務殿、大順殿、文華殿、春林殿、和春殿、華渚堂、翠阜堂、流芳堂、清風堂。永樂大典引洛陽志：清風堂下有光風堂。〔按稿本，此注爲張穆補。〕崇蘭堂、麗景堂、鮮雲堂、迴流亭、流風亭、露華亭、飛香亭、芝田亭、長塘亭。永樂大典引洛陽志作草塘亭。〔按稿本，此注爲張穆補。〕芳洲亭、翠阜亭、芳林亭。永樂大典引洛陽志芳林亭下有流芳亭。〔按稿本，此注爲張穆補。〕飛華亭、留春亭、徵秋亭、洛浦亭，皆隋煬帝所造。武德、貞觀之後多漸移毀，顯慶後，田仁汪、韋機等改拆營造，或取舊名，或因餘所，規制與此異矣。

外郭城

東京城，隋大業元年築，曰羅郭城。唐長壽二年，李昭德增築，按隋時外城僅有短垣，昭德始築之。改曰金城。按會要：天寶二年正月二十八日築神都羅城，號曰金城。則金城之名非始於武后矣。前直伊闕，後倚邙山，東出瀍水之東，西出澗水之西，雒水貫都，有河漢之象焉。按三輔黃圖云：始皇築咸陽宮，端門四達，以象紫宮，引渭水貫都，以象天漢。則煬帝蓋倣秦之爲也。周五十二里。韋述記曰：東面十五里二百一十步，南面十五里七十步，西面十二里一百二十步，北面七里二十步，周回六十九里二百十步。新書地理志曰：東西五千六百十步，南北五千四百七十步，西連苑，北自東城而東二千五百四十步，周二萬五千五十步，其崇丈有八尺。〔六

典注作西面連苑，距上陽宮七里，北面距徽安門七里。張鷟判：有大匠吳淳，掌造東都羅城，牆高九仞，隍深五丈。南面

三門，正南曰定鼎門，南通伊闕，北對端門。隋曰建國，唐武德年平王世充改。大唐新語：長壽三年，則天徵天下

銅五十萬餘斤，鐵三百三十餘萬，錢二萬七千貫，于定鼎門內鑄八棱銅柱，高九十尺，徑一丈二尺，題曰大周萬國述德天

樞。東曰長夏門，在定鼎門東五里。廣明庚子，汝州召募軍李巡光等一千五百人，自鴈門回，掠東都南市，焚長夏

門而去。蓋南市與長夏門惟隔四坊也。西曰厚載門。在定鼎門西二里。隋曰白虎門，唐初避廟諱改。東面二

門，北曰上東門，西對東城之宣仁門。隋曰上春，唐初改。中曰建春門，隋曰建陽，唐初改。薛懷義於建春門

內敬愛寺別造殿宇，改名佛授記寺。見舊書外戚傳。南曰永通門。河南志作中曰羅門，南曰建春門，而無永通之

名，惟于注中引韋述記曰：建春南曰永通。蓋永通後廢，作志時已無此門也。今從六典、韋述記。續定命錄：樊陽源有

表兄任密縣令，使人招之，遂出永通門宿。許渾有出永通門經李氏莊詩，是唐時有此門也。北面二門，東曰安喜

門，隋曰喜寧，唐初改。按「喜」或作「善」，非。西曰徽安門。南部新書：徽安門樓上元多雀鴿，後絕無。清泰中，

帝上此樓自焚，俗謂之「火燒門」。杜鵬舉傳：鵬舉在洛城暴卒而蘇，云見兩人持符來召，相引徽安門出，直北上邙山。蓋

此門外卽邙山。城內縱橫各十街，河南志引韋述記曰：定鼎門街廣百步，上東、建春二橫街七十五步，長夏、厚載、

永通、徽安、安喜及當左掖門等街，各廣六十二步，餘小街各廣三十一步。凡坊一百十三，市三。隋曰里一百三，

市三。唐改曰坊。河南志引韋述記曰：每坊東西南北各廣三百步，開十字街，四出趨門。通鑑：魏景明二年，司州牧廣

陽王嘉請築洛陽三百二十三坊，各方三百步，詔發畿內夫五萬人築之，四旬而罷。按唐時坊一百十三，則魏時坊或兼城

外數之，或字誤也。又按唐之三市，皆非隋三市之舊，隋無西市，唐無東市。當皇城端門之南，渡天津橋，至

定鼎門，南北大街曰定鼎街。亦曰天門街，又曰天津街，或曰天街。河南志引韋述記曰：自端門至定鼎門七里

一百三十七步，隋時種櫻桃、石榴、榆、柳，中爲御道，通泉流渠，今雜植槐、柳等樹兩行。褚載定鼎門詩：郊廓城高門倚

天，九重蹤跡尚依然。須知道德無關鎖，一閉乾坤一萬年。

定鼎門街東第一街，從南第一曰明教坊。

龍興觀。西南隅，尚書右丞宋璟宅。太平御覽：璟造宅悉東西相對，不爲斜曲，以避惡名。顏魯公宋

璟碑：薨于東都明教里第。南門之東，清河縣子、國子司業崔融宅。太平御覽：融爲則天哀冊，用思精苦，下

直，馬過其門不覺，文就而卒。

次北宜人坊。本曰宜民，避唐太宗諱改，或作「仁」者，非。

半坊太常寺藥園。本隋齊王暕宅西南隅，荷澤寺。

次北淳化坊。

祁國公、贈太尉、益州大都督王仁皎宅。

次北安業坊。隋有薛道衡宅。廣異記：開元末，東京安業坊有書生，夜中理書，鬼邀之，出坊至寺門鋪，

俄至定鼎門內。安業當卽安業之訛。

太僕寺。典廩署。霍王元軌宅。李懷遠宅。

次北修文坊。隋立國子學于此，因曰修文。有麥鐵杖宅。

弘道觀。顯慶二年，盡併一坊之地爲雍王宅。王升儲，立爲弘道觀，因改坊名曰弘道。按會要：章懷太子于

咸亨三年徙封雍王，則顯慶時不得有雍王宅也。河南志原注誤。名畫記：弘道觀東封圖是吳道玄畫。兩京記乃云非名手，誤也。

次北尚善坊。

太史監。本崇賢館。宗正寺。內僕局。右驍衛大將軍阿史那忠宅。阿史那忠碑：薨於洛陽尚

善里之私第。岐王範宅。本武三思宅，宅有薛稷畫鶴。舊書外戚傳：武崇訓尚安樂郡主，時三思用事于朝，欲寵其

禮，中宗爲太子在東宮，三思宅在天津橋南，自重光門內行親迎禮，歸於其宅。薛王業宅。本太平公主宅。坊北，

天津橋。元和郡縣志：天津橋在河南縣北四里，隋煬帝大業元年初造。此橋以架維水，用大船維舟，皆以鐵鎖鉤連

之，南北兩路，對起四樓，其樓爲日月表勝之象，然維水溢，浮橋輒壞。貞觀十四年，更令石工，原誤爲上，今據元和郡縣志改正。」累方石爲脚。爾雅：斗牛之閒爲天漢之津，故名取焉。按唐人由西京至東都，皆由天津橋。高宗還東都，

百官見于天津橋南是也。白居易詩：津橋東北斗亭西，到此令人詩思迷。

右定鼎門街東第一街，六坊。

定鼎門街東第二街，北隔維水，當皇城之左掖門。從南第一曰樂和坊。

國子學。本韓王元嘉宅。同鳳閣鸞臺平章事、建昌郡王武攸寧宅。齊景冑宅。工部侍郎

李適宅。吏部尚書李景讓宅。新書李景讓傳：景讓宅東都樂和里，世稱清德者，號樂和李公云。

次北正平坊。正或作政，非。

孔子廟。**國子監。**開元初，祕書監吳道師撰碑立廟前。舊書儒學傳：尹知章卒，門人孫季良等立碑于東都

國子監之門外，以頌其德。**安國女道士觀。**本太平公主宅。安慶緒囚甄濟于安國觀，見舊書忠義傳。李商

隱爲馬懿公郡夫人王氏黃籙齋文：妾某住河南府河南縣正平坊安國觀內。**常州刺史平貞宅。**張說平貞旌碑：

薨于河南之正平里第。**兵部尚書李迥秀宅。**舊書本傳：所居宅中生芝草數莖，又有猫爲犬所乳，中宗以爲孝感所

致，使旌其門閭。**左散騎常侍、襄陽郡王路應宅。**韓愈路應碑：薨于東都正平里第。

次北修行坊。

奉國寺。本張易之宅。**白居易有東都奉國寺禪德大師照公塔銘。****豆盧欽望宅。****銀青光祿大夫致**

仕李義琰宅。舊書本傳：義琰宅無正寢，弟義璉市堂材送焉，義琰竟不營構。及將歸東都田里，公卿已下相餞于通

化門外，時人以比漢之二疏。**劉軻宅。**劉軻陳玄奘塔銘：歲丁巳，開成紀年之明年，有具壽沙門曰令檢，自上京抵

洛，師以經義盛三藏遺文傳記，訪余柴門于行修里。「行修」即「修行」之訛。**太常少卿杜氏宅。**溫庭筠有和太常杜

少卿東都修行里嘉蓮詩。

次北崇業坊。

福唐觀。李邕有東京福唐觀鄧天師碣。**申王撝宅。****守司徒、同平章事、充東都留守裴度宅。**

次北修業坊。

景雲女道士觀。鄜國公主宅。本許敬宗宅。

張說鄜國長公主碑：薨于河南縣之修業里。按公主爲睿

宗第八女，降薛敬，後降鄭孝義。代國公主宅。本陸頌宅。

鄭萬鈞代國長公主碑：薨于河南修業里第。按公主爲

睿宗第五女，降鄭萬鈞。

次北旌善坊。北至雒水。

崇化寺。特進、尚書右僕射、上柱國溫彥博宅。虞恭公碑：薨于旌善里第。寧王憲宅。本安

樂公主宅。明威將軍梁待賓宅。楊炯梁待賓碑：終于東都旌善里私第。李翱宅。李翱來南錄：元和四年正

月，自旌善第以妻子上船于漕，乙未去東都。

右定鼎門街東第二街，六坊。

定鼎門街東第三街，北當雒水之中橋，又當東城之承福門。從南第一曰尚賢坊。

天官侍郎張錫宅。父子五人列戟，時號萬石張家。建安王武攸宜宅。檢校納言、兼肅政臺御

史大夫狄仁傑宅。大理卿裴談宅。崔明沅宅。河東節度使韋湊宅。左衛將軍、范陽郡公

張知謩宅。

次北敦行坊。

司農寺。司竹園。本周思茂宅。吏部尚書裴濯宅。鄴郡太守、長垣縣子、恒王傅吳兢宅。

滄州刺史鄭孝本宅。以致仕終于此里，見孫逖所作墓誌。里肆。杜牧集：川守大夫劉公早歲寓居敦行里肆，有題壁十韻。

次北崇政坊。

秋官尚書杜景佺宅。刑部尚書王志愔宅。李伯潛宅。按李伯潛未知何人，常袞有贊善大夫李

君墓誌銘云：君諱某，天寶十四載終于東京崇政里之私第。載此俟考。太子賓客、贈禮部尚書崔沔宅。顏魯

公崔孝公宅陋室銘記：公既留司東都，遂霑所乘馬，就故人監察御史張洙子深河南府崇政坊買宅以製居，建宗廟于西南。

維先太夫人安平郡夫人堂在宅之中，儉而不陋，淨而不華，六十餘年，榱棟如故。堂東嫂盧夫人所居，堂之東北鄭氏、李氏姊歸寧所居。堂之北五步之外，建瓦堂三間以居之。

次北宣範坊。

半坊爲河南府廨。西北去宮城七里。古監洛城，即古之甘城也。隋置都，平之。按禹貢：豫州之域，秦始

立三川郡，三川者，伊、洛、河也。漢改河南郡。曹魏時，以司隸校尉所掌置司州，領河南等五郡。晉穆帝時，桓溫入維

陽，復置河南郡。宋武帝復置司州。後魏都維陽，爲河南尹。隋文帝置河南道行臺省，煬帝建新都，改維州爲豫州，大業

三年，罷州爲河南郡，十四年復置維州。王世充又爲司州。武德四年復爲維州，開元元年改維州爲河南府。太子賓

客元行沖宅。

次北恭安坊。隋有馮慈明宅。

太子僕寺。右散騎常侍、舒國公褚无量宅。禮部侍郎賈曾宅。魏奉古宅。王怡宅。

次北勸善坊。隋有李圓通宅。

東北隅，太子太師鄭公魏徵宅。太平御覽：魏徵宅山池院有進士鄭光又畫山水，爲時所重。後王方慶

居之。開府儀同三司、畢國公竇希瓘宅。戶部尚書畢構宅。

次北惠訓坊。北至維水，隋有翻經館。

長寧公主宅。按公主爲中宗第四女，降楊慎交，後降蘇彥伯。新書長寧公主傳：東都廢永昌縣，主丐其治爲

府，以地〔原誤作「池」，據新唐書改。〕瀕洛，築鄣之。又曰：魏王泰故第，東西盡一坊，滸沼三百畝。泰薨，以與民，至是主

丐得之。按永昌縣廢在道德坊，道德與惠訓相接，故兩坊皆有長寧公主宅，而魏王池在旌善、尚善之間，東與兩坊相屬，

長寧因丐得之也。岐王山亭院。密亳二州刺史鄭仁愷宅。崔融鄭仁愷碑：薨于東都惠訓里第。坊北舊

中橋。隋大業初造，名立德橋，唐上元中韋機徙于東街。

半已西道術坊。隋煬帝多忌惡，五行、占候、卜筮、醫藥者皆追集東都，置此坊，遣使檢察，不許出入。時

改諸坊爲里，以此偏居里外，既技藝所聚，謂之道術坊。唐貞觀中併坊地以賜魏王泰，泰爲池彌廣數頃，號魏王池。

泰死，後立爲道術坊，分給居人。神龍中併入惠訓坊，盡爲長寧公主第。開元初復舊。通鑑：大業三年勅河南諸郡

送一藝戶陪東都三千餘家，置十二坊於洛水南以處之。按此則道術坊卽十二坊之一也。

右定鼎門街東第三街，八坊。

定鼎門街東第四街，北隔維水，當外郭之徽安門。卽長夏門之西街，從南第一曰歸德坊。

黃門侍郎、扶陽縣子韋承慶宅。尚書左丞相、徐國公劉幽求宅。左散騎常侍劉子玄

宅。中書令韋嗣立宅。張說道遙公墓誌：薨于歸德里。盧言宅。唐語林：盧言舊宅在東都歸德坊南街，廳屋

是杏木梁，西壁有韋冕郎中散馬七匹，東壁有張旭草真蹟數行。宅之東果園，兩京新記云是馬周舊宅。旅舍。補錄

紀傳：李固言初未第時，寓歸德里。長夏亭。門內客亭。水南倉。制度甚雄敞，倉南有土冢，俗傳是蔡邕墓。水

南草場。

次北康俗坊。俗或作裕，非。

左丞相、燕國公張說宅。張說先府君張鷟碑：夫人長樂縣太君馮氏，傾背于東都康俗里第。按鷟卽燕公

父，馮氏卽燕公母。張九齡張燕公墓誌：薨于東都康俗里第。又張說李氏張夫人墓誌：臨淄李伯魚妻范陽張氏女，伯魚

卒，夫人寡居無子，以歸宗焉，傾逝于康俗里。按張夫人卽燕公之姊。太子詹事陸餘慶宅。尚書右丞、工

部尚書、東都留守劉知柔宅。前亳州刺史盧瑗宅。通幽記：貞元九年，前亳州刺史盧瑗家于東都康俗

坊，瑗父正病卒，後兩日正晝，忽有大鳥色蒼，飛于庭，巡翔空閒，飛入西南隅井中，久而飛出，人往視之，井水已竭，中獲

二卵，大如斗，將出破之，血流數斗，至明，忽聞堂西奧有一女人哭，出就東間，却往西間，拽其尸，如糜散之，出門而滅。

成都功曹蕭公宅。穆員蕭公墓誌：終于康俗里第。

次北敦化坊。本名基化坊，景雲初避明皇名改。隋有永昌公主宅。

麟跡女道士觀。

劇談錄：東都敦化坊有麟迹見于興慶觀，殿宇悉皆頽毀。

咸通中畢誠相國別令營造，建基址

聞，得巨甕，皆貯白銀。

維州刺史賈敦頤宅。

後爲鄒王府。

突厥阿史那斛瑟羅宅。

尚書左丞相、兼

侍中源乾曜宅。

戶部尚書陸象先宅。

嗣許王瓘宅。

桂州觀察使李勃宅。

酉陽雜俎：東都敦化坊百

姓家，大和中有木蘭一樹，色深紅，後桂州觀察使李勃看宅人以五千買之，宅在水北，經年花紫色。

河南府法曹參

軍盧貽宅。

韓愈盧府君夫人苗氏墓誌：

卒於東都敦化里。

按貽與苗氏卽昌黎之妻父母。

鄆縣尉劉刺夫宅。

三水小牘：彭城劉刺夫，大中年授鄆縣尉，卒，妻王氏歸其家，居維陽敦化里第。

汝州魯山縣令皇甫枚宅。按枚

撰三水小牘云：余在維敦化里第，渤海徐公譙爲余言王知古事。是枚宅在此坊矣。

次北道化坊。

道化一作遵化，隋有王邵宅、趙才宅。

定安公主宅。

公主爲中宗第三女，降王同皎，後降韋濯，三降崔銑。

益州大都督府長史、贈禮部尚

書皇甫無逸宅。

本隋蕭瑄所居，後爲唐臨宅。

右領軍府大將軍房仁裕宅。

本隋郡學。

中書令崔湜

宅。

張說榮陽夫人鄭氏墓誌：終于維陽之遵化里。

按鄭氏卽湜之母。

次北溫柔坊。

李晦宅。

太平公主婿豆盧光祚居焉，後爲秦國公主宅。

按會要無秦國公主。

睿宗第七女曰蔡國，或形近而

訛。

瓊山縣主宅。

閤門使薛貽簡園。

號薛氏奉親園，園內流杯石，傳自平泉徒致。

次北擇善坊。

率更寺。太尉、英國公李勣宅。左衛大將軍、同中書門下三品、韓國公張仁愿宅。本隋

來護兒宅。宣城公主宅。宣城公主爲憲宗第五女。按維陽第宅，多是武后、中宗時居東都所立，中葉以後，不得

有公主宅。考中宗第二女曰宣城公主，降裴巽，「宣」蓋「宜」之誤也。同鳳閣鸞臺平章事、譙縣子婁師德宅。

次北道德坊。本曰道訓坊，北至維水。隋有秦王浩宅。

東南隅，永昌縣廨。永昌中析河南、維陽二縣立永昌縣，治此坊。神龍元年省。按紀聞云：唐衛州司馬杜

某爲維陽尉時，有賊在維陽城南午橋人家殺人，將財至城，舍于道德里，欲出外，不能去，乃出道德坊南行，忽空中有火，遮其前，不得南出，因北走入縣門。蓋是未省縣時也。武成王廟。景龍女道士觀。南北居半坊之地，金仙公主

處焉。按公主爲睿宗第九女。長寧公主宅。內史史務滋宅。

右定鼎門街東第四街，長夏門之西街，七坊。

長夏門之東第一街，定鼎門街東之第五街也，南出長夏門。從南第一曰仁和坊。坊本名民和，

避唐太宗諱改，當作「人和」。而太平御覽、白居易集及河南志所引韋述記皆作仁和。河南志引韋述記云：此坊北

側數坊，去朝市遠，居止稀少，惟園林滋茂耳。

兵部侍郎許欽明宅。欽明，戶部尚書國師猶子，與中書令郝處俊鄉黨親旅，兩家子弟類多醜陋，而盛飾車

馬，以遊里巷，京雒爲之語曰：衣裳好，儀觀惡，不姓許，卽姓郝。禮部尚書裴寬宅。子孫最衆盛。柳玭戒子孫文

云：東都仁和里裴尚書寬，天后時宰相魏玄同選尚書之先爲婿，未成昏而魏陷羅織獄，家徙嶺表。及北還，女已踰笄，其

家議無以爲衣食資，願下髮爲尼，有一尼自外至，曰女福厚豐，必有令匹，子孫將徧天下，宜北歸。家人遂不敢議。及荆門，則裴齋裝以迎矣。兵部侍郎裴隣宅。按白居易裴常侍齋微架詩注：裴君所居名仁和里。蓋亦裴氏之族也。

諸城劉氏云：大和題名有裴潯，則「隣」當作「潯」。益州長史、南陽公杜行敏宅。杜牧六代祖，賜宅在仁和里。

按宰相世系表：行敏爲牧之六代祖。

次北正俗坊。

按宣室志：長慶初，雒陽利俗坊有民行車數兩，將出長夏門，有一人負布囊，求寄囊于車中，因返入利俗坊。疑利俗卽此正俗也。

玄元觀。李從遠宅。太子太傅分司東都李固言宅。盧氏宅。竇從直盧公夫人崔氏墓誌：元

和甲午，終于東都正俗里之私第。

次北永豐坊。

尚書右僕射楊再思宅。戶部尚書崔泰之宅。吳師道宅。邠王府長史陰公宅。張均陰府

君碑：寢疾東都，終于永豐第。按陰君夫人卽燕公之妹。太子賓客杜氏宅。唐詩紀事：蔣防有杜賓客永豐里新

居詩。西南隅，柳樹。盧貞和白尚書賦永豐柳詩序：永豐坊西南角有垂柳一株，柔條極茂。

次北修善坊。隋有蔡王智積宅。河南志引韋述記云：坊內多車坊、酒肆。

波斯胡寺。太子賓客盧正己宅。常袞盧正己墓誌：薨于東都循善里之私第。按循、修雙聲，古多

通用。

次北思順坊。

隋有諸葛穎宅。

洛陽縣龍門三龜有貞觀二十一年思順坊老幼等造彌勒像，卽此坊也。

戶部尚書、長平公楊纂宅。中書令張嘉貞宅。

嘉貞子延賞，延賞子弘靖，皆爲相，其居第亭館之麗，

甲于雒城，子孫五代，無所加工，時號三相張家。

次北福善坊。

此坊有坡，地勢隆起，名福善坡。

河南志云：韋述記不著此坡，疑張全義保南州時所築壘垣，

其後未嘗平蕩，因以得名。

畫墁錄云：唐家二百八十餘年，河決二穀，雒城歲爲患，壞天津，浸城闕，墊城郭不已。

宋時自祥符至熙寧，福善坡以北率被昏墊，城下惟福善坡不及，城外惟長夏門不及，雒中有語云：長夏門外有莊，福善坡頭有宅。乃知水讖不苟云。

次北惠和坊。

隋大業四年，坊內道東南醴泉涌出，水面濶五尺，暖而甘，泉上常有氣如霧，疾病者取飲之，

多效，時人謂曰神泉，至九年枯竭。

安修仁宅。官舍。

王紹宗兄元宗口授銘序：垂拱之歲，吾六兄見疾大漸，委化于伊、雒之間，僑居惠和里之

官舍。

次北安衆坊。

北至雒水。

工部尚書尹思貞宅。尚書右僕射、燕國公于志寧宅。

令狐德棻于志寧碑：薨于東都安衆里之第。

寶庭芝宅。

唐語林：李鄴侯居憂于河清縣，騎驢入雒，至中橋南遇大尹，避道，驢驚逸而走，徑入分司寶庭芝員外宅。

鄴侯與僕者共造其門，庭芝出，降階而拜，延接信宿，贈送甚厚，但云貴達之日，願以一家爲託。及朱泚之亂，庭芝降賊，

德宗首命誅之，鄴侯累白以舊事，乃原其罪。按言中橋之南，即安衆坊也。坊北中橋。此新中橋也。舊書李昭德傳：初都城維水天津之東，立德坊西南隅有中橋及利涉橋。上元中，司農卿韋機始移中橋，置于安衆坊之左街，當長夏門，都人甚以爲便，因廢利涉橋，所省萬計。然歲爲維水衝注，常勞治葺。昭德創意積石爲脚，銳其前以分水勢，自是竟無漂損。

右長夏門之東第一街，八坊。

長夏門之東第二街，從南第一曰興教坊。

祕書少監趙雲卿宅。

河南志引蕭穎士集：興敬里有趙雲卿宅。

按「敬」即「教」之訛。

李師道留後

院。

通鑑：李師道置留後院于東都，本道人雜沓往來，吏不敢詰。

考異引河南記曰：賊帥營嘉珍于東都留後院潛召募二

百餘人，造置兵仗。會門子健兒有小過被笞，遂使兄弟一人告河南府。當時飭兩縣驅丁壯悉持弓矢刀棒，圍興道坊院數

重，因縱火焚其院。

按興道即興教，通鑑言賊出長夏門望山而遁，興教正在長夏門內也。或原作「興道」，河南志因下

宣教而訛。

留後院，舊書呂元膺傳作「邸院」。

次北宣教坊。

本名弘教，神龍初避孝敬皇帝諱改。

懷音府。

見地理志。

全真觀。

齊州司馬陸孝斌宅。

張說陸孝斌碑：夫人盧氏，終于雒陽之宣教里。

安鄉郡長史黃撝宅。

劉庭珍撰故安鄉郡長史黃府君夫人彭城劉氏龜銘云：夫人歸江夏黃撝。寢疾，終於東京宣

教里之私第。

太子少師皇甫鏞宅。

白居易皇甫鏞墓誌：薨于東都宣教里第。少師，墓誌作「少保」。

淮南節

度使、趙國公李紳宅。

李紳廉察東維，初到維陽，寓居宣教里。

次北陶化坊。

隋有修行寺、史祥宅。

元稹贈呂二校書詩注：與呂校書同年科第，後爲別七年，元和己丑

歲八月，偶于陶化坊會宿。

侍中、譙郡公桓彥範宅。禮部尚書蘇頌宅。太僕卿、華容縣男王希雋宅。

張九齡王府君

墓誌：薨于維陽之陶化里第。

楚材按：希雋之名見蘇頌授王希雋太僕卿制。

希雋又有宅在西京朱雀門街東第三街親

仁坊。〔按稿本，楚材按語爲張穆補。〕河南府參軍張軫宅。

呂巖說張軫墓誌：開元廿年六月五日，因調遣疾，終于

洛陽陶化里之私第。按軫，東之之孫，東之作其父元弼墓誌，亦言終于洛陽，是洛陽世有張氏宅矣。

穆案：星伯先生卒

於道光二十八年三月初一日，此條則將屬續之前四、五日手書示穆，令補入書中，時穆新遭妻喪，兒孝蘭疾亦垂殆，倉皇

摧割之際，竇持手蹟，幸未遺失，附注於此，以志痛也。

工部尚書、東都留守盧從愿宅。

王光輔宅。

光輔名

瞰，以字行，石泉公方慶長子，官至潞州刺史。

楚材按：石泉公居魏鄭公宅，在定鼎門第三街勸善坊。

〔按稿本，楚材按

語爲張穆補。〕太子賓客高重宅。空宅。

宣室志：東都陶化里有空宅，大和中，張秀才借得肄業。夜深敲枕，乃見

道士與僧徒各十五人，從堂中出，排作六行，別有二物展轉于地，秀才以枕擲之，皆不見。明日于壁角中得一敗囊，中有

長行子三十箇並骰子一雙。

次北嘉善坊。

隋有元文都宅、韋津宅。

荷澤寺經坊。

鄭果宅。

嗣虢王邕宅。

祕書監蘇踐言宅。

五行記：蘇踐言左相，溫國公長子，居

于嘉善里。永昌年六月，與其弟崇光府錄事參軍踐義退朝還第，弘道觀東猝遇暴雨，震電光來繞踐言等馬，回旋甚急，有頃方散。

次北南市。

隋曰豐都市，東西南北居二坊之地，其內一百二十行，三千餘肆，四壁有四百餘店，貨賄山積。

貞觀九年促半坊。

通鑑：李密以孟讓爲總管，讓夜帥步騎三千人東都外郭，燒掠豐都市。又曰：越王侗運回洛倉米

入城，遣兵五千屯豐都市，五千屯上春門，五千屯北邙山。

按豐都市隋之東市，唐以其在維水南，故曰南市。

長壽寺。

朝野僉載：東都豐都市在長壽寺之東北，初築市垣，掘得古冢，土藏無埤壁，棺木陳朽，觸之便散，屍上

著平上幘、朱衣，得銘云：筮道居朝，龜言近市，五百年間，于斯見矣。當時達者參驗，是魏黃初二年所葬也。書肆。呂

溫上官昭容書樓歌：君不見洛陽南市賣書肆，有人買得研神記。紙上香多蠹不成，昭容題處猶分明。詩注云：貞元十四

年，友人崔仁亮於東都買得研神記一卷，有昭容列名書縫處。

次北通利坊。

太尉、英國公李勣宅。

按擇善坊亦有李勣宅。

尚舍直長薛氏宅。

薛府君夫人裴氏墓誌：夫人裴氏，

河東聞喜人，考終于通利之里第。

玉沙灘。

在坊之北，亦曰玉沙磧。

次北慈惠坊。

河南志引韋述記曰：此坊半已北卽維水之橫堤。

異聞錄：京兆韋安道，大足年中於維陽早

出，至慈惠里西門，由里門循牆而南行百餘步，有朱扉西向，「向」原誤「閒」，據太平廣記卷二九九引改。」扣之，有朱衣官乘安道以大馬，與之聯轡出慈惠西門，由正街西南自通利街東行，出建春門。

紫微令姚崇宅。

胡昭姚文獻公碑：公後娶劉氏，累封彭城郡夫人。今紫微令崇，故宗正少卿景之母，終于洛

陽慈惠坊之私第。又見張說姚文貞公碑：崔沔光祿少卿姚府君碑。銀沙灘。亦曰銀沙磧。

右長夏門之東第二街，六坊及南市。

長夏門之東第三街，北隔雒水，當北郭之安喜門。從南第一曰嘉慶坊。

演繁露引韋述兩京記：

東都嘉慶坊內有李樹，其實甘鮮，爲京城之美，故稱嘉慶李。

次北集賢坊。

刑部尚書、魏國公楊玄琰宅。泉獻誠宅。中書舍人孫逖宅。

孫逖宋州司馬先府君墓誌：棄背

于東都集賢里之私第。中書令裴度宅。舊書本傳：東都立第于集賢里，築山穿池，竹木叢萃，有風亭水榭，梯橋架

閣，島嶼迴環，極都城之勝槩。太師致仕盧鈞宅。

次北尊賢坊。

楊玄琰宅。泉獻誠宅。按二宅已見前坊，或跨有兩坊之地也。

崔玄童宅。東都留守鄭叔明宅。宋

開府善羯鼓，叔明祖母卽開府之女，尊賢第中有小樓，宋夫人習羯鼓之所。

按穆員有維陽縣主簿鄭約墓誌，言卒於東

都尊賢里第，疑是叔明之族，附此俟考。

成德軍節度使、兼侍中田弘正宅。

西陽雜俎云：宅中門外有紫牡丹

成樹，發花千餘朵。

次北章善坊。

太子少傅、幽國公竇希城宅。

招成太后之弟，賜第。

洛州錄事參軍殷子恩宅。

顏魯公康希銑碑

云：夫人陳郡殷氏，太子中舍人開禮之曾孫，右清道率令德之孫，洛州錄事參軍子恩之第五女，公薨之年，殁于東都章善坊私第。按康公爲會稽人，是年卒於會稽，夫人蓋依母家也。

次北永泰坊 貞觀九年析南市置。

鴻臚少卿張敬詵宅。

薛長孺張敬詵墓誌：卒於洛陽永泰里之私第。

按雲麾將軍河南府押衙張府君夫人

上黨樊氏墓誌云：公諱銑，終于洛陽永泰里之私第。疑是敬詵之族，俟考。率府郎、上柱國某氏宅。徐珙某夫人墓誌：君壽邱夫人疾終于維陽永泰里之私第。

次北臨闌坊。

次北延福坊。

福先寺。

有水磴，四輪齊轉。

名畫記：福先寺吳道玄畫地獄變，有病龍最妙。

舊書德王裕傳：昭宗至維下，一

日幸福先寺。

次北富教坊。

次北詢善坊。

北至維水。

郭廣敬宅。

後爲姚崇山池院，崇薨，爲金仙公主所市。

右長夏門之東第三街，九坊。

長夏門之東第四街，從南第一曰崇讓坊。

禮部尚書蘇頌竹園。河南志引韋述記曰：此坊出大竹及桃，諸坊即細小。兵部尚書顧少連宅。杜黃

裳顧少連碑：薨于維陽崇讓里之私第。河陽節度使王茂元宅。李商隱即茂元婿，有崇讓里詩數篇。太僕卿

分司東都韋瓘宅。瓘自州觀察使除分司，大中二年十二月七日過涪溪，題云：分司優閒，誠爲忝幸，宦途蹇薄，分亦

可知。因吟：作官不了卻歸來，還是杜陵一男子。余洛川弊廬在崇讓里，有竹千竿，有池一畝，罷郡之日，攬猿一隻，越鳥

一雙，疊石數片，將歸洛中，方與猿鳥爲伍，得喪之際，豈足介懷。舒州刺史鄭甫宅。穆員鄭甫墓誌：卒于東都崇讓

里第。李氏宅。宣室志：東都崇讓里有李氏宅，里傳云其宅非吉，固不可居，李生既卒，其家盡徙居陸渾別墅。開元

中，有王長史者，質李氏宅以居焉。

次北履道坊。隋有樂平長公主宅，即文帝長女、周宣帝后也。又有宇文愷宅。

長壽寺果園。源匡贊宅。高力牧宅。西門內，刑部尚書白居易宅。舊書本傳：居易罷杭州，

歸維陽，于履道里得故散騎常侍楊憑宅，竹木池館，有林泉之致，爲池上篇曰：都城風土水木之勝在東南偏，東南之勝在

履道里，里之勝在西北隅，西開北垣第一第，即白氏叟樂天退老之地。地方十七畝，屋室三之一，水五之一，竹九之一，而

島樹橋道間之。按居易宅在履道西門，宅西牆下臨伊水渠，渠又周其宅之北，宅去集賢裴度宅最近，故居易和劉汝州

詩注云：履道、集賢兩宅相去一百三十步。新書本傳：後履道第卒爲佛寺，東都江州人爲立祠焉。穆按：元史塔里赤傳：

也里里白奉旨南征，至洛陽，得唐白樂天故址，遂家焉。是其時猶有遺跡。宅南，吏部尚書崔羣宅。按白居易與

劉夢得偶到敦詩宅感而題壁詩云：履道淒涼新第宅。蓋其宅在白宅之南，故居易聞樂感鄰詩注云：東鄰王大理去冬云亡，南鄰崔尚書今秋薨逝。又祭崔尚書文云：雒城東隅，履道西偏，修簷迴舍，流水潺湲，與公居第，門巷相連。旅舍。杜牧上劉大夫詩注：某六代祖，國初賜宅在仁和里，尋已屬官舍，今于履道坊賃宅居止。

次北履信坊。

本恭儉坊，避武太后曾祖改名。

邠王守禮宅。

本霍王元祥宅。

館陶公主宅。

公主爲高祖第十七女，降崔宣慶。

太子少保韋夏卿

宅。

宅有大隱洞。

元稹有陪韋尚書丈歸履信宅詩。

呂溫韋夏卿碑：

薨于東都履信里之私第。

武昌軍節度使元

稹宅。

白居易詩注：微之履信新居多水竹。

太子賓客李仍淑宅。

宅有櫻桃池，

仍淑嘗與白居易、劉禹錫會其

上。

白集有履信池櫻桃樹上醉後走筆詩。

陝虢觀察使盧嶽宅。

穆員盧嶽墓誌：

貞元四年，范陽盧公壽六十，中

疾于位，優詔得謝，家東都履信里。

左千牛韋珣宅。

元稹韋珣母段氏墓誌：終于履信里第。

將軍柳當宅。

雜說：柳當將軍者，在履信東街有樓臺水木之盛。

韋氏宅。定命錄：崔元綜事，侍郎韋陟堂妹，宅在東京履信坊十字街

西道北，崔元綜就冒其家。

按「元綜」一作「元諒」。

次北會節坊。

祆祠。左散騎常侍徐堅宅。

河南志云韋述記不載。

趙懷正宅。

酉陽雜俎：百姓趙懷正住維會節坊，

段成式家人雇其妻賀氏紉針。按雜俎作「惠節」，今正。

次北綏福坊。

道沖女道士觀。河南兵曹元盛宅。穆員元盛墓誌：卒于東都綏福里第。

次北從善坊。坊有梁袁象先宅。

來庭縣廨。長壽中以蕃胡慕義，請立天樞，武太后析維陽、永昌二縣，置來庭縣廨于此坊，以領四方蕃客。後蕃

客隸鴻臚寺，神龍元年省。孝敬皇帝廟。禮閣新儀曰：開元七年建廟于東都從善里，天寶之後祠饗遂絕。按舊

書玄宗紀：于東都來庭縣廨置義宗廟，蓋其時縣已省，故即廢廨以立廟。左散騎常侍劉子玄宅。劉子玄宅在歸德

坊，而權德輿集奏孝子劉敦儒狀云：孝子劉敦儒年四十九，曾祖子玄，祖況，父浹，住東都從善坊，其時旌表門閭，即在從

善坊，維中謂之劉孝子，蓋其徙居也。孝子郭思謨宅。孫翌郭思謨墓誌：無幾何，憶新筭，後園叢篁，忽苞而出。所

居從善里，其竹樹存焉。劉太白宅。元稹送劉太白詩：維陽大底居人少，從善坊西最寂寥。想得劉君獨騎馬，古隄

秋樹隔中橋。注云：太白居從善坊。

次北陸仁坊。「仁」字避太宗諱改，當作「人」，而韋述記與世所傳皆作「仁」。坊內出柿實，俗稱陸仁之柿，

嘉慶之季。坊有梁袁象先園，園有松樹。

次北嘉猷坊。北至維水。

右長夏門之東第四街，八坊。

長夏門之東第五街，從南第一曰里仁坊。

次北永通坊。本曰依仁。河南志引韋述記云：此坊東出外城之永通門，其後門塞，又改坊名。按河南志

于外郭城條下言：永通門廢于宋初，則言事述記誤。

虢州刺史崔玄亮宅。

白氏長慶集有聞崔十八宿予新昌敝宅時予亦宿崔家依仁新亭詩，其詩有曰：依仁萬莖

竹。又有崔十八新池詩，蓋宅有水竹之勝。

次北利仁坊。

慕容詢宅。 和州刺史張擇宅。

白居易張擇碑：終于東都利仁里私第。

居易利仁北街詩云：草色斑斑

春雨晴，利仁坊北面西行。踟躕立馬緣何事，認得張家歌吹聲。按所謂張家者，疑卽擇之後人。擇終于天寶十三載，不與白傳同時。

次北歸仁坊。

泰山廟。 乾寧元年建。太子太傅、留守東都牛僧孺宅。

舊書本傳：維都築第于歸仁里，任淮南時，嘉

木怪石，置之階庭，館宇清華，竹木幽邃，常與詩人白居易吟詠其間。

按白集有牛相公歸仁里新成小灘詩。

次北懷仁坊。

南街東出外城之建春門。

右散騎常侍、太子賓客徐彥伯宅。

張嘉福宅。

鄭夫人宅。

孫逖鄭孝本墓誌：孝本終于東都敦

行里，夫人王氏終于東都懷仁里。

次北仁風坊。

「風」或作「豐」，非。

尚書右僕射、兼中書令、齊國公魏元忠宅。

濟王府錄事參軍裴榮期宅。

杜甫故萬年縣君京

兆杜氏墓碑：終堂于東京仁風里。卽河東裴榮期之夫人也。坊南運渠。

次北靜仁坊。

官藥園。

次北延慶坊。北至維水。

右長夏門之東第五街，八坊。

定鼎門街西，從南第一曰寧人坊。本日寧民，避太宗諱改。其後多曰寧仁。

龍興寺。

名畫記：寺有展子虔畫八國王〔原誤作「三」，今據歷代名畫記改正。〕分舍利。穆員有東都龍興寺均上

人功德記。并州大都督府長史、贈吏部尚書、荊州大都督崔日用宅。工部尚書、東都留守韋虛心宅。孫遜韋虛心碑，薨于東都寧仁里私第。

次北寬政坊。隋有于仲文宅。坊有興禪師碑，唐中書侍郎嚴挺之撰，胡霽然書。

河南縣廨。河南縣本漢舊縣，後魏靜帝改爲宜遼縣，周宣帝復爲河南，隋仁壽四年遷都，移縣治于此坊。駙

馬都尉裴巽宅。本舒王元名宅。駙馬都尉鄭萬鈞別宅。太常卿、潞州大都督府長史崔日知宅。

榆柳園。俗傳隋煬帝置，垣牆內外多植榆柳，亦曰西御園，與師子園隔街相對。

次北淳風坊。隋有圓行寺。

同東西臺三品、贈汴州刺史楊弘武宅。駙馬都尉王守一宅。本武嗣宗宅。

次北宣風坊。 隋有衛文昇宅。

安國寺。 寺舊在水南宣風坊，本隋楊文思宅，後賜樊子蓋。唐爲宗楚客宅，楚客流嶺南，爲節愍太子宅。太子

升儲，神龍三年建爲崇因尼寺，復改衛國寺，景雲元年改安國寺。會昌中廢，後復葺之，改爲僧居。諸院牡丹特盛。 檢

校文昌左丞、東都留守李嶠宅。 北街之西，中書令蘇味道宅。 有三十六柱亭子，時稱巧絕。

次北觀德坊。 隋于此坊置百官射棚，取射以觀德之義，因以名坊。又有國子監。唐初唯內臣所居，長壽中

敕不許他人居止。

景福寺。 本千金公主宅，垂拱中，自教業坊徙景福尼寺于此，會昌中廢。

次北積善坊。 北至維水。 隋有周法尚宅。 文昌雜錄曰：後唐同光三年，維京蕃漢馬步使朱守殷，于積善

坊役所得古文錢四百五十六文曰得一元寶。四百四十文曰順天元寶。〔兩「曰」字原脫，據文昌雜錄卷三補。〕

太微宮。 天寶元年正月，置玄元皇帝廟于此坊，九月改廟爲太上玄元皇帝宮，二年改太微宮。杜光庭歷代崇道

紀云：衢州爲建觀宇，穿地得魚一頭，長三尺，其狀似鰻，微微帶紫碧之色，又如青石，光瑩雕鏤，殆非人功所成也，扣之甚

響，遣使來獻。帝呼爲瑞魚磬，命懸于太微宮。明皇舊宅。 本高士廉宅，聖曆初玄宗兄弟出閣，五人分院同居此坊，號

五王子宅。明皇八分書院額。右金吾衛韋機宅。 後爲丘神勣宅，神勣誅，以賜張易之。易之誅，爲將作監。河內

縣尉陳該宅。 陳子昂陳該石人銘：遇疾，于神都積善坊考終厥命。司禮卿、贈幽州都督崔神慶宅。李及

宅。 廣異記：李及性好飲酒，所居在京積善坊。坊北月陂。 河南圖經曰：維水自苑內上陽宮南，瀾漫東注。隋宇文

禮版築之，時因築斜隄，束令東北流，當水衝捺堰，作九折，形如偃月，謂之月陂。其西有上陽、積翠、月坡三堤。明皇開元末作三堤，命李適之撰記，永王璘書。其記云：及泉而下巨木，飛輪而出伏水，然後積石，增卑而培薄，方下而銳上。餘皆殘闕不可辨，記之背列明皇諸子及當時公卿名位。世傳安祿山陷維陽，觀之云：此多有賢士之名。蕃音訛爲鹽鼓，遂號鹽鼓碑。

右定鼎門街西第一街，六坊。

定鼎門街之西第二街，北隔雒水，當皇城之右掖門。從南第一曰從政坊。

揚州大都督府長史、贈戶部尚書李傑宅。

次北大同坊。本日植業坊，隋大業六年徙大同市于此，凡周四里，市開四門，邸一百四十一區，資貨六十六

行，因亂廢。唐顯慶中，因舊市以名坊。

洛汭府見地理志。

次北承義坊。「承」或作「永」，非。

申王搆宅。後爲王毛仲宅。刑部尚書韋抗宅。蘇頌韋抗碑：薨于雒之承義里第。

次北明義坊。本日顯義，避中宗諱改。隋有蜀王秀宅。

左右教坊。崔令欽教坊記云：東京兩教坊，俱在明義坊，而右在南，左在北也。坊南西門外卽苑之東也，其間

有頃餘水泊，俗謂之月陂，形似偃月，故以名之。尚書左僕射、鄒國公韋安石宅。

次北教義坊。

武后母榮國夫人宅。後立太原寺。武后登上陽宮，遙見之，輒懷感，乃徙于積德坊。此坊與禁苑連接。

次北洛濱坊。北至維水，垂拱中築入苑。

右定鼎門街西第二街，六坊。

定鼎門街之西第三街，卽厚載門第一街，從南第一曰西市。河南志引韋述記曰：厚載門第

一街，街西本固本坊，又改西市。隋有姚辨宅、甲弩坊，天經宮乃文帝寢廟。朝野僉載：則天璽間知微于西市。

按唐以隋之東市爲南市，故不置東市，而於隋南市之西置西市。

望仙橋。南對厚載門，北對右掖門。

次北廣利坊。河南志引韋述記曰：廣利坊其北抵苑，卽隋富義坊。隋有陳叔寶宅。

右定鼎門街西第三街，一坊及西市。

定鼎門街之西第四街，卽厚載門第二街，從南第一曰通濟坊。河南志引韋述記：通濟坊卽

隋懷義坊。

次北淳和坊。

其西南里，河南志引韋述記：南里、北里在淳和之西。

次北北里。

吳少微宅。吳少微哭富嘉謨詩序：河南富嘉謨卒，予時寢疾于雒陽北里。

右定鼎門街西第四街，三坊。

雒水之北，東城之南，承福門之東，從西第一曰承福坊。坊南新中橋，南當長夏門。

次東玉雞坊。按水經注：含始受玉雞之瑞于雒水，故坊以爲名。李庚東都賦：左掖通東，右掖洞西，籠故地

之銅駝，抱舊里之玉雞。

次東銅駝坊。通鑑：晉懷帝步出西掖門，至銅駝街。水經注：雒陽城中太尉、司徒兩坊間謂之銅駝街。按

此坊蓋取銅駝爲名，而非卽魏晉之銅駝街也。

次東上林坊。

次東溫雒坊。

右雒北、漕南二水之間，五坊。

雒水之北，東城之東，第一南北街，北當徽安門西街，承福坊之北，從南第一曰立德

坊。在宣仁門外街南。

胡祆祠。四庫提要西學下云：「云」字當衍。」引宋敏求東京記載，寧遠坊有祆神廟。注曰：四夷朝貢圖云：康國

有神名祆，畢國有火祆祠，或曰石勒時立此。按東京無寧遠坊，而會要與此皆有祆祠，未識所引東京記見于何書，俟考。

王本立宅。後爲都水監，吏部選院。監察御史裴氏宅。穆員裴府君墓誌：終于立德里之第。水陸轉運判

官孟郊宅。孟郊有立德新居詩。寫口渠。通鑑：陳懷文引渠刺世充，世充衷甲不能入，懷文走趣唐軍，至寫口追獲，殺之。

次北清化坊。隋有鄒王楊慶宅、許道進宅。河南志引河洛記曰：越王侗即位，李密遣李儉送降款，以清

化里紀洪政宅爲賓館，以處儉。通鑑：羅士信帥勇士，夜入雒陽外郭，縱火焚清化里。

左金吾衛。按朝野僉載：天后永昌中，有宿衛十餘人于清化坊飲。當卽金吾衛士也。弘道觀。有老君像，

明皇、肅宗二像侍立。恒州刺史、建昌公王義童宅。楊炯王義童碑：薨于雒陽之清化里。廢宅。博異志：天寶

中，金陵陳仲躬攜數千金，于雒陽清化里假居一宅，其井甚大，常溺人，仲躬命匠淘之，得一古銅鏡。次日移居立德坊，後三日，清化宅井無故自崩，兼延及堂隅東廂，一時陷地。旅舍。定命錄：袁天綱初至雒陽，在清化坊安置，朝野歸湊，人

物常滿。都亭驛。

次北道光坊。隋有元壽寺。

昭成寺。名畫記：寺有張遵禮、程遜畫，西廊障日西域記圖，楊廷光所畫。朝野僉載：雒州昭成佛寺有安樂公

主造百寶香鑪，高三尺，用錢三萬。韓氏宅。逸史：太學博士鄭還古向東洛，再娶李氏，于昭成寺後假宅拜席，宅主

姓韓。

次北道政坊。本曰元吉坊，永徽中改。隋有楊義臣宅。

千金塢。水經注：河南十二縣境簿曰：河南縣城東十五里有千金塢。雒陽記曰：千金塢，舊堰穀水，魏時更修

此堰，謂之千金塢，積石爲塢，而開溝渠五所，謂之五龍渠，後張方入洛破之，大和中修復故塢。

右徽安門西街，四坊。

東城之東，第二南北街，北當徽安門東街，從南第一曰歸義坊。

坊南卽玉雞坊，瀍水自北

來，東南合洛河。

太平寺。

垂拱二年太平公主建。

祕書監致仕穆寧宅。

按寧與夫人裴氏皆終于此宅，見穆員所撰元堂

誌。福建觀察使李貽孫宅。大中時人。

次北思恭坊。

河南志引韋述記：思恭在歸義之北。

張大安宅。右羽林軍大將軍、遼陽郡王李多祚宅。駙馬都尉王守一山亭院。歙州刺

史邢羣宅。

杜牧邢羣墓誌：卒於東都思恭里。

唐參軍宅。

廣異記：雒陽思恭里有唐參軍者，立性修整，簡於接

對。王廣宅。

杜牧故平盧軍節度巡官李戡墓誌：卒於雒陽友人王廣思恭里第。

朱七娘宅。

廣異記：東都思恭坊

朱七娘者，倡姬也。有王將軍素與交通。開元中，王遇疾卒，已半歲，朱不知也。其年七月，王忽來朱處，久之日暮，曰：

能隨至溫柔坊宅否？不獲已，以後騎載去入院，歡洽如故。明日，王氏使婢收靈牀被，見一婦人在被中，問其故，送還

家焉。

次北履順坊。

隋有牛弘宅。

沙苑監。杜康祠。

次北進德坊。北抵城。隋有辛公義宅。

郊廓府見地理志。

右徽安門東街，四坊。

東城之東，第三南北街，北當安喜門西街，從南第一曰景行坊。

拜洛壇。華嚴寺。江州刺史鄭善果宅。在拜洛壇北。都亭驛。前臨灋水。唐制，駕在京有馬九

十四，在都一百五匹。按京謂西京，都謂東都。

次北北市。本臨德坊，顯慶中立爲北市。廣異記：張仁壘幼時貧乏，恒在東都北市寓居。

次北敦厚坊。隋有觀王楊雄宅。

試大理評事裴君宅。柳宗元裴君墓誌：終于河南敦厚里。

次北修義坊。北抵城。坊有晉司空裴楷墓。

右安喜門西街，三坊及北市。隋北市曰通遠，見通鑑注，蓋亦自通遠移于此也。

東城之東，第四南北街，北當安喜門東街，從南第一曰時泰坊。隋有通遠橋，跨漕渠，橋南

通遠市，周六里，市南臨維水，有臨寰橋。

放生池。其南卽上林坊之地。

其東時邕坊。隋有蘇威宅。

鄭王宅。

本鄭貴妃宅。其南卽上林坊官園之地。戶部尚書致仕崔俊宅。

按元稹有贈太子少保崔俊墓

誌銘云：薨于維陽時邕里。疑「俊」卽「俊」之誤。

旅舍。

張說故瀛州河間縣丞崔漪碑：奉使上都，遘疾，終于時邕里之

旅館。

次北立行坊。

隋有字文述宅。

大聖真觀。

上東門草場。

其東北有土臺，俗傳云晉石崇龍姬綠珠墓。河南志言韋述記不載，疑非是。

次北殖業坊。

坊有晉司空王戎墓。封演開見錄曰：王戎墓，隋代醴家穿其傍作窖，得銘曰晉司徒尚書令

安豐元君王公之銘。〔今封演書石誌條作「晉司徒、尚書令安豐侯王君銘。」〕俗傳爲朱買臣墓，非是。〔按稿本，此坊內原有銀青光祿大夫、行內侍員外置同正員、上柱國張元忠宅，注云：「按元忠夫人令狐氏墓誌云：夫人卒于京兆府殖業里之私第。西京無殖業坊，故載于此。」後爲張穆刪去，移于卷四之首西京光祿坊後缺名之坊下。〕

衛國寺。

神龍二年，節愍太子建，以本封爲名。會昌中廢，光化中復建，有小院十一。

趙仁獎宅。

御史臺

記：唐趙仁獎，河南人也。得販于殖業坊王戎墓北，善歌黃顰，與宮官有舊，因所附託，景龍中負薪詣闕，遂得召見，云負薪助國家調鼎，卽日臺拜焉。睿宗朝左授上蔡丞，時崔宜一使于都，仁獎附書于家，題云：西京趙御史書，附到維州殖業坊王戎墓北第一鋪，付妻一娘。宜一以書示朝士。客舍。陳子昂孫虔墓誌：遇暴疾，卒於維陽殖業里之客舍。酒家。朝野僉載：兵部郎中朱前疑貌醜，其妻有美色。天后時，維中殖業坊西門酒家有婢，蓬頭垢面，偃肩瞠腹，寢惡之狀，舉世所無，而前疑大悅之。

次北豐財坊。北抵城。

中書令、汾陰公薛元超宅。楊炯薛振行狀：振字元超，薨于維陽豐財里之私第。

右安喜門東街，五坊。

東城之東，第五南北街，從南第一曰毓材坊。隋維陽縣廨在此坊。西去宮城八里。又有李

雄宅。

大雲寺。本後魏淨土寺。隋大業四年，自故城徙建陽門內。貞觀三年，復徙此坊。天壽二年改大雲，會昌中

廢。祕書監、常山縣公馬懷素宅。馬懷素墓誌：終于河南之毓材里第。郎中李敬彝宅。北夢瑣言：彭城

劉山甫，自云外祖李敬彝爲郎中，宅在東都毓材坊，土地最靈，家人張行周事之有應。未大水前，預夢告張求飲食，至其

口，率其類過水頭，並不衝圯李宅。郭大娘宅。廣異記：維陽郭大娘者，居毓材里，以當壚爲業。某氏宅。白居易

有重到毓材宅有感詩云：軒窗簾幕皆依舊，只是堂前欠一人。未知誰氏之宅，俟考。

次北德懋坊。

次北毓德坊。

洛陽縣廨。元和郡縣志：洛陽本秦舊縣。貞觀六年，自金墉城移入郭內毓德坊。鬪富臺。洛人相傳石崇、

王愷築會之所。河南志言韋述記不著，疑妄。陸渾尉崔泳宅。穆員崔泳墓誌：卒於洛陽毓德里之私第。又有崔少

尹夫人盧氏墓誌：終于洛陽毓德里之私第。按盧氏卽泳之母。

次北審教坊。北抵城。

戶部尚書、朔方軍節度使王陵宅。御史大夫、贈右丞相程行謀宅。蘇頌程行謀碑，薨于洛陽

審政里第。按政卽「教」之訛。陳憲宅。陳憲墓誌：薨于東都審教里第。

右東城之東，第五南北街，四坊。

東城之東，第六南北街，從南第一曰積德坊。隋曰遊藝坊，盡一坊爲楊素宅，宅有沈香堂。坊南

卽溫洛之地。

太原寺。自教義坊徙于此。崔融代皇太子賀天后芝草表云：伏承芝草生于東都太原寺舍利塔屋下。司農寺

輸場。長松營。太平公主園。

次北教業坊。隋有長孫熾宅。

天女尼寺。貞觀九年建景福寺，武后改天女，會昌中廢。金吾將軍裴休貞宅。記聞：休貞微時與弟元

休居教業里。「元休」原誤爲「元素」，今改正。」

次北興藝坊。

金谷府。見地理志。麟趾尼寺。

次北通遠坊。北抵城，「遠」或作「達」。

樂工李龜年宅。明皇雜錄曰：開元中，樂工李龜年能歌，特承顧遇，于東都通遠坊大起第宅，僭侈踰于公侯，

中堂制度，甲于都下。其後裴晉公度購得之，移于定鼎門別廬，號綠野堂。

右東城之東，第六南北街，四坊。

維渠。

維水在維陽縣西南三里，河南縣北四里。西自苑內上陽宮之南，流入外郭城。東流經積善坊之北，分三道，當端門之南立橋。南枝曰星津橋，中枝曰天津橋，北枝曰黃道橋。《玄宗紀》：開元二十年四月，改造天津橋，毀星津橋，合爲一橋。過橋，又合而東流，經尚善、旌善二坊之北，南溢爲魏王池。與維水隔隄，初建都築隄，壅水北流，餘水停成此池，下與維水潛通，深處至數頃，水鳥翔泳，荷菱翻覆，爲都城之勝也。貞觀中以賜魏王泰，故號魏王池。泰黜後，賜東宮，屬家令寺。又東北流，經惠訓坊之西，分爲漕渠。分流處置斗門，上有橋，橋上有屋，水勢峻急，激湍百餘步。穆員有新修漕河石斗門及新修漕河石斗門亭二記。斗門之西舊中橋，隋名立德橋，北當徽安門，因水溢壞，顯慶中建都後置。中橋，上元中司農卿韋機移入東街。過斗門又東，流經新中橋。南當長夏門，北通西漕。橋南北三百步，武德初置浮橋，尋廢，韋機乃徙中橋于此。後漕水復壞，永昌中，敕將作監少匠劉仁景修繕，李昭德統其事，殊爲堅壯，號永昌橋，尋廢其名。又東經安衆、慈惠二坊之北，有浮橋。隋造，名利涉橋，北抵通遠市南壁之西偏門。王世充平，橋市俱廢。顯慶中復置，南當南市之北壁東偏門，北當北郭之安喜門。乾封中又廢，後乃私造，以舟爲梁。又東流經詢善、嘉猷、延慶三坊之北，出郭城。

通濟渠。

通濟渠，自苑內支分穀、維水，流經都城通濟坊之南，故以名渠焉。過通濟坊，又東北流經西市，東折而東流至河南縣之西，又北流至寬政坊之西北隅，東流過天門街，經宜人、正平坊，北流至崇政坊西，過河南府、宣範、恭安坊西北，又東北抵擇善坊西北，東流經道德、惠和、通利，按渠至通利、慈惠之北，有浮橋。通鑑云：洛水逕端門，左右掖門前，有天津、永濟、中橋三橋。按橋無名永濟者，疑卽通濟之浮橋，「通」誤作「永」耳。富教、睦仁、靜仁六坊之南，屈而北流，過官藥園、延慶坊之東，入維水。天寶中，壅蔽不通，渠遂涸絕。

通津渠。

按通津之名，蓋以通天津橋也。

通津渠，隋大業元年開。

於午橋莊在長夏門南五里。

西南二十里分維堰分維堰北十里有重津

橋，見宋會要。

引維水，又于正南十八里龍門堰引伊水，伊水在河南縣東南十八里。

以大石爲杠，互

受二水。維水一支西北流，名千步磧渠。

又東北距河南縣三里，名通津渠。

由厚載門入都

城，經天街北、天津橋南入于維。

伊水分二支，西支正北入城，經歸德之西，折而東流，又北

經正俗、永豐之西，又折而東南流，經修善、嘉善南，合于東支。

東支東南入城，經興教坊

西，又折而東流，經宣教、集賢之南，又折而北，經履道之西，以周其北，又東經永通之北，又

折而北經利仁、歸仁、懷仁之東，以入于運渠。

運渠。

運渠，自都城之東，西北流至外郭之東南隅，屈而北流，經永通、建春門外，又屈而西流入城，經仁風坊南，又西經從善坊南，分爲二流，屈曲至臨闕坊南而合，至南市北，有福先寺水磴，又北流經延福、富教、詢善坊西入維。

漕渠。

漕渠，本名通遠渠。隋開。自斗門下枝分維水，當維水中流立堰，令水北流入此渠，有餘水然始東下。時令官奴捺此堰，亦號蜀子堰。初隋煬帝以爲水灘洩多石磧，不通舟航，乃開此渠。下六十餘里至偃師之西，復與維合。東北流，至立德坊之南，西溢爲新潭。長安中司農卿宗晉卿開，以通諸州租船。四面植柳，中有租場，積石其

下，于上布土。潭立石柱，馬吉甫爲其文，鍾紹京書。後潭中水淺，租船不能至。又東流至歸義坊之西南，有西

槽橋。南當中橋，乾封中造。又東流至景行坊之東南，有漕渠橋。大業初造，初曰通濟橋，南抵通遠市之

北西偏門。自此橋之東，皆天下之舟船所集，常萬餘艘，填滿河路，商旅貿易，車馬填塞，若西京之崇仁坊。又東流經

詩邕、毓財、積德三坊之南，出郭城之西南。

穀渠。

渠在雒水之北，自苑內分穀水東流，至城之西南隅入雒水。渠南隋有石瀉，後入上陽宮。玉海載宋會要云：政和四年宋昇奏：西京端門前，考唐洛陽圖舊有四橋，曰穀水、曰黃道，在天津橋之北。則上陽宮、皇城之間，渠上當有橋也。

漣渠。

漣水元和郡縣志：漣水在河南縣西北六十里。按「西北」疑當作「東北」。自修義坊西南流入外郭城，南流經進德、履順二坊之東，又東南流，穿思恭坊，通宣仁門南流，經歸義坊入漣渠。開成五年七月，避武宗諱，改漣水爲吉水。

洩城渠。

渠自含嘉倉城出，循城南流至宣仁門南，屈而東流，經立德坊之北，至東北隅遠其坊，屈而南流入漣渠。

寫口渠

渠自宣仁門南，枝分洩城渠，南流與皇城中渠合，循城南流，至立德坊之西南隅，遶其坊，屈而東流入漕渠之西，有司農官磴。